

## Mamamili wangka julyjujanu

*Julyjuminyirri Mama ngarnawarrapurlukalu palyarnu  
ngarnka, parnalurrju*

Julyjujanu 1:1 – 2:3

### Karrpu kuju nyinangu

*Julyjujanu 1:1-5*

Julyjuminyirri Mama ngarnawarrapurlukalu palyarnu ngarnka, parnalurrju. Palunyangka parna nyinapayi puurra, murltuminyirri, kalyuwiwaju ngarripayi. Mungalulu juturnu kalyungka. Kurrurnpa kunyjyunu Mamamili parra yankupayi wangalyuru, ngarnawarra kalyungka. Palunyangka Mama ngarnawarrapurluka wangkangu. Wajarnu palulu, “Rantala!” Kayila rantarnuka raayanu. Jampa Mamalu nyangu rantanyja, pukurlarringura. Palunyajanupulanya lalapungu rantanyjakamu munga. Palunyajanu Mamalu yinijunu rantanyja “karrpu”. Kayila yinijunu munga “mungajarra”. Yuu, rukarringu, kuju karrpu pakirringu. Yungunpakarnu.

### Karrpu kujupangka ngarnka yutirringu

*Julyjujanu 1:6-8*

Kalyu ngarripayi parlarri, kalyuwapayi. Palunyajanu Mamalu wajarnu, “Yutirriwa ngarnka! Kalyu lalapuwa!” Jilanyangulyu Mamalu palyarnu ngarnka. Palunyajanupulanya

ngarnkalu lalapungu kalyu. Kalyu karlkinpa ngarringu ngarnawarra munkarra. Karlkinpa kalyu ngarripayi kaninyjarra. Palunyajanu Mamalu yinijunu kalyu ngarnawarra, “ngarnka”. Yuu, palunyajanu rukarringu, kujupa karrpu pakirringu. Yungunpakarnu.

### **Karrpu kujupa parna yutirringu, warta pakara wanarnu**

*Julyjujanu 1:9-13*

Palunyangkara Mamalu wajarnu kalyuku, “Wayila kujukarti, kujungkarrirakun!” Kayilara wajarnu parnaku, “Miralarri!” Palunyajanu yiltangulyu parna yutirringu. Palunyajanu Mamalu yinijunu parna, “parna”. Kayila yinijunu kalyunga kujungkarrinyjanga, “kujungurru”. Palunyajanu Mamalu parra nyanguka pukurlarringu. Kayila wajarnu, “Kunyjunyuminyirri.” Palunyajanu Mamalu wajarnu, “Pakalaya wartakaja parnajanu nyaa nyirrinyirri! Karlkinnyurra pakalku wartakaja wilykiwintikaja, yungkalpintiawintikaja. Karlkinnyurra pakalku wartakaja mirrkawintikaja.”

Palunyangka yiltangulyu, parnajanuya wartakaja pakara wanarnu, nyaa nyirrinyirri. Pakarnuya wartakaja wilykiwintikaja, yungkalpintiawintikaja. Ngapiyuruya?, paruyuru, yuwinyjiyuru. Jampa wilyki parujanu wartajanu punkara kurrungu parnangka, wartayila paru pakarnu. Mirta kujupa warta, paki, parungulyu. Jilanyaya yurlupirti nyinani wartakaja, wilykiwintikaja. Yuu, witukaya pakarnu wartakaja mirrkawintikaja. Ngapiyuruya?, wamurlayuru, jawirliyuru. Ngaakajaluya mirrkakajalu kanyirni wilyki ngururpa. Jampa wilyki wamurlajanu mirrkajanu punkara kurrungu, parnangka. Wartayila wamurla pakarnu. Mirta kujupa warta, paki, wamurlangulyu. Jilanyaya yurlupirti nyinani wartakaja, mirrkawintikaja, yuu.

Palunyajanu Mamalu parra nyanguka pukurlarringu. Kayila wajarnu, “Kunyjunyuminyirri.” Yuu, palunyajanu rukarringu, kujupa karrpu pakirringu. Yungunpakarnu.

### **Karrpu kujupa jirntukamu wirllarra yutirringu**

*Julyjujanu 1:14-19*

Palunyajanu Mamalu wajarnu, “Jirntu, yutirriwa ngarnkangka! Wirllarra, yutirriwa ngarnkangka! Kurtalyakaja, yutirriwaya ngarnkangka!” Kayilara wajarnu jirntuku, “Nyinaran karrpupintiwiyaju.” Wajarnujanampa wirllarakukamu kurtalyakajaku, “Nyinaranyurra mungajarrapintikajawiyaju. Nyinakunyurra ngarnkapintikaja ngarnkangka wulungulyu. Jampanyurranyaya nyaku martukajalu ngarnkapintikaja, kulilkuya karrpu, mungajarra, wantajarra, yalijarra. Jilanyaya kulilku. Yuu, nyinakunyurra ngarnkangka. Kanyurra parra pirrpalku parnakarti.” Palunyajanu yiltangulyu. Yutirriraya parra pirrparnu parnakarti.

Yuu, Mamalupulanya ngapirnu jirntukamu wirllarra. Kujarrangulyupula maju kujarra. Majujaranga palulu ngapirnu junu, rantalkuraku, karrpungkawiyaju. Kujupajaranga julijaranga palulu ngapirnu junu, rantalkuraku, mungangkawiyaju. Kajananya Mamalu ngapirnu junu kurtalyakaja, ngarnkawana, yuu. Mamalujananya yarnnga junu ngarnkangka, parra pirrpalkurakuya parnakarti. Jirntunga karrpupinti, parra pirrparni parnakarti karrpukurluwiyaju. Wirllarakamuya kurtalyakaja mungajarrapintikaja, parra pirrparniya parnakarti mungangkawiyaju. Jampajananya Mamalu nyangu, pukurlarringujanampa. Wajarnuyila, “Kunyjunyuminyirriya.” Yuu, palunyajanu rukarringu, kujupa karrpu pakirringu. Yungunpakarnu.

### **Karrpu kujupa kuka kalyukarrayijakamu turru yutirringu**

*Julyjujanu 1:20-23*

Palunyajanu Mamalu wajarnu, “Kalyukarrayijakaja, yutirriwaya kalyungka! Yarnngakuyarraya yutirriwa!” Kayila wajarnu, “Turrukaja, yutirriwaya! Kaya parra parrpakala ngarnawarra!” Yuu, yiltangulyu. Mama ngarnawarrapurlukalujananya ngapirnu kalyukarrayijakaja,

nyaa nyirrinyirri, majukamu juku. Mirtajananya kujunkujun ngapirnu, paki, yarnngangulyujananya ngapirnu. Kajananya ngapirnu turrakaja nyaa nyirrinyirri. Jampajananya Mama ngarnawarrapurlukalu nyangu, pukurlarringujanampa. Wajarnuyila, "Kunyjunyuminyirri."

Palunyangkajanampa Mama ngarnawarrapurlukalu wajarnu, "Ngampurr kanyinmalparnanyurranya." Kajanampa wajarnu kalyukarrayijakaku, "Wululuya nyukapungama. Japukajajananyanyurra kanyinmalpa. Kanyurra yarnngarriku wanalku kalyungka. Yuu, nyinakunyurra kujungurrungka, karruwanalurrju." Kajanampa Mama ngarnawarrapurlukalu wajarnu turrakajaku, "Wululuya nyukapungama! Kanyurra yarnngarriku wanalku." Yuu, palunyajanu rukarringu, kujupa karrpu pakirringu. Yungunpakarnu.

## Karrpu kujupa kuka parnawanaya yutirringu, ka martu ngapirnu

*Julyjujanu 1:24-31*

Palunyajanu Mamalu wajarnu, "Kukakaja, miralarriwaya! Yarnngakuyarraya yutirriwa! Nyaa nyirrinyirrinnyurra nyinaku parnawana." Palunyangkaya yiltangulyu kukakaja yutirringu. Mamalujananya ngapirnu kukakaja, purnujanukaja. Nyaa nyirrinyirriya nyinapayi purnuwana. Kajananya ngapirnu kukakaja, parrikijanukaja. Nyaa nyirrinyirriya nyinapayi parrikiwana. Yuu, Mamalujananya ngapirnu kuwiyikaja nyaa nyirrinyirri. Jampajananya Mamalu nyangu kukakaja yarnnga, pukurlarringujanampa. Wajarnuyila, "Kunyjunyuminyirri."

Palunyajanu Mamalu wajarnu, "Karu, ngapilkurarnajananya martukaja, ngayuyuruya nyinaku. Kajanampaya nyinaku maaja ngaangka parnangka. Maajajanampaya nyinaku kalyukarrayijaku. Kajanampaya nyinaku maaja turrakajaku. Maajajanampaya nyinaku kuwiyikajaku yarnngaku. Yuu, maajajanampaya nyinaku." Jilanyangulyu wajarnu Mamalu. Palunyajanupulanya Mamalu ngapirnu martu kujarra. Yuu, ngapirnupulanya yirnakamu wanti. Mamalupulanya ngapirnu palunyayuru kujarra walyjayuru kujarra. Yuu, Mamayurungulyupula martu kujarra nyinapayi. Yirnakamupula wanti nyinapayi. Jampapulanya ngapirnu yirnakamu wanti.

Mamalupulampa wajarnu, "Ngampurr kanyinmalparnantapula wululu, yuu. Kanyilkujananyapulan ngankalku ngulyikaja yarnnga. Kanyurra yarnngarriku martukaja nyuntu kujarrakamu marlajanukaja nyuntu kujarramilikaja. Parranyurra yanku nyinaku yinta kujarra yintangka. Kanyurra nyinamalpa maaja ngaangka parnangka. Nyinakujanampanyurra maaja kalyukarrayijaku. Nyinakujanampanyurra maaja turrakajaku. Nyinakujanampanyurra maaja kuwiyikajaku yarnngaku. Yuu, maajajanampayurra nyinaku.

"Ngaanya kujupa wangka. Yungkunirnanyurranya

mirrka, ngalkuraku. Yuu, yungkunirnanyurranya wartakaja wilykiwintikaja yungkalpinti-wintikaja nyaa nyirrin-yirri. Ngapiyuruya?, paruyuru, yuwinyjiyuru. Ngayulurnanyurranya yungkuni wartakaja mirrkawintikaja. Ngapiyuruya?, wamurlayuru, jawirli-yuru. Mirrkanyurrampaya nyinamalpa. Yungkunirnajanampa kukakaja mirrka wituka. Yukurijanampa mirrka nyinamalpa yarnngaku kukakajaku, turrakajakulurrju." Palunyangka yiltangulyu. Palunyajanuananya Mamalu parra nyangu yarnnga palyarnunya, Mamanga pukurlarringu. Mukumukurringujanampa. Wajarnuyila, "Kunyjunyuminyirringulyuya." Yuu, rukarringu, kujupa karrpu pakirringu. Yungunpakarnu.

### **Warrkamujanu Mamanga yurlta nyinangu**

*Julyjujanu 2:1-4*

Yuu, Mamalu ngapirnu ngarnka, parnalurrju. Mamalujananya ngapirnu yarnnga ngarnkangka nyinanyjanpa. Palulujananya ngapirnu yarnnga parnangka nyinanyjanpa. Ngapirnujananya junu. Nyaa nyirrin-yirringulyuya nyinapayi. Warrkamurripayi Mama ngarnawarrapurluka karrpuparaku karrpungka. Warrkamu palunyamili wiyamanu Mamalunga. Jampa yungunpakarnu, Mamanga yurlta nyinangu. Mirta warrkamurringu jiingka karrpu kujupangka, paki, yurlta nyinangu, warrkamujanu Mamanga yurlta nyinangu. Ngapirnu Mamalu parnakamulurrju, karrpuparaku karrpungkalu. Ngapira yurlta nyinangu. Jiijanu Mamalu wajarnu wangka junu, "Ngaanya karrpu kujupa kujupaminyirri."

### **Yaata-mukamupula Yiipi nyinapayi yintangka Yiitanja**

*Julyjujanu 2:25 – 3:24*

### **Jilalulu wantingka muunpungu**

*Julyjujanu 2:25 – 3:6*

Nyupararrapula nyinapayi. Nyinapayipula nyimparraparni, mirtangkupula kurntarripayi, paki. Mamalujananya palyarnu kuwiyikaja. Kujuyila palyarnu yalyjirrpapa, yalyjirrminyirri, jilangurninyjinga. Yanulu jila wantikarti. Kara japirnu, "Kaji yilta? Kajinpulampa Mamalu wajarnu?, 'Mirtanpula ngalkura mirrkakaja wartajanu.' " Wantilura wajarnu jilaku, "Mamalulimpaju wajarnu, 'Ngalkuranpula mirrka karlkijanu wartajanu. Kujua warta yikini ngaangka. Kutungkangulyu yikini. Mirtanpula ngalkura mirrka jiijanu wartajanu, paki, junkuranpula.' Yuu, jampaliju pampulku mirrka wartangka jiingka, miturrikuliju."

Jilalura wajarnu wantiku, "Ngala! Mirtan miturriku, paki." Wajarnura jilalu, "Jampan ngalku, kuranarrikun. Mamayururrikun, yuu. Mamalunpulampa mikulu wajarnu, 'Mirtanpula ngalkura'. Jampan ngalku jiinya mirrka, nintipukarrikun. Nintirrikuran kunyjunyuku. Nintirrikuran walykuku. Yuu, Mamayururrikun." Palunyangka wanti yanu wartakarti, nyangu mirrka wartangka. Mirrka wartangka wiltiyikipayi. Jampa mirrka nyangu, wajarnu wantilu, "Kunyjunyu ngaanya mirrka. Kunyjunyumpa ngalkupinti." Palunyangka wurr ngangkulpayi, "Jamparna ngalku ngaanya mirrka, nintipukarrikurna". Palunyangkajananya mirrkakaja witarnuka kangu ngalangu. Kara kangu yungu kirtapartarnu. Yungura. Ngalanguyila kirtalu.

### **Ngalangupula kurntarringu**

*Julyjujanu 3:7*

Jampapula mirrka ngalangu, kuranarringupula. Nyangukangkupula wajarnu, "Nyimparraparnili nyinani."

Kangkupula kurntarringu. Palunyangkayilapula manu parrkakaja majukaja. Kapula nyimparrarnu parrkajanu.

### **Mamapulampa mirrangu**

*Julyjujanu 3:8-13*

Palunyangkapula Mama ngangkulpayi jakarrpa. Maaja maju ngarnawarrapurluka parra yankupayi yukartu yaltayaltangka yintawana. Palunyangkalurapula Mamangkamarra yanu kukurringu wartapuru. Mamara mirrangu yirnergurninyjiku, "Wanyjawan?" Palunyangkara yirnalu wajarnu Mamaku, "Kulirnurnanta jakarrpa, karna ngurlurringu nyimparraparni. Kukurringuyilarna wartapuru." Mamalura japirnu yirnak, "Nganalungku wajarnu?, 'Nyimparraparnin nyuntu, kurntarrikuran.'" Mamalura japirnu, "Ngalangun mirrka wartajanu? Nyaamparnanta wajarnu? Wajarnurnangu, 'Mirtan ngalkura.'" Wajarnura Mamalu jilanya. Palunyangkara yirnalu wajarnu Mamaku, "Nyuntulujun junu wanti ngayuku. Karni palunyalungulyu mirrka manu yungu. Ngalanguyilarna." Palunyangkara Mamalu japirnu wantiku, "Nyaapan ngapirnu?" Palunyangkara wantilu wajarnu, "Jilalungulyurni muunpungu, pakirni kajarnu. Ngalanguyilarna mirrka."

### **Mamalupulanya warrkirnu**

*Julyjujanu 3:14-21*

Palunyangkara Mamalu jilaku wajarnu, "Putamanun nyuntulu. Karnanta watalku junku. Palunyajanun parra wayinmal nyurungka parnawana. Parra wayinmalpan wulu wirlangka. Wankalpin parnawana ngalya ngarrimalpa. Parnan ngalkumalpa. Mirtarnajananya watalku junku pulukukaja, paki. Mirtarnajananya watalku junku karlki kukakaja, paki, nyuntungurninyjirnanta watalku junku."

Palunyangkara Mamalu wajarnu jilaku, "Wirla rarrungkupula nyinamalpa nyuntukamu wanti ngaanya. Mirtangkunpula nyuntu kujarrawiyaju nyinaku wirla rarru, paki. Wulungkuya nyinaku wirla rarru jamukaja nyuntumilikajakamu jamukaja wantimilikaja marlajanukaja. Yuu, wirla rarrungkunyurra nyinamalpa wulu. Jampantaya wantimililu marlajanukajalu nyaku, kantulkukantaya karljarrpungku katanyuku. Jampajananyan nyaku nyuntulu wantimili marlajanukaja, pajalkujananyan tartanyuku, yuu." Jilanyara wajarnu Mamalu jilaku. Palunyangkara Mamalu wajarnu wantiku, "Kanguran wangka jilaku nyuntulu. Palunyajanurnangu wajarni, 'Jampan jiji kanyilku, wilyjiwilyjirrimalpan. Nyuriran wangkamalpa nyupaku kirtaku nyuntumiliku, mirtaran parlanyarriku, paki. Palunyangkangu yirnanga nyupanga nyuntumilinga nyampali nyinamalpa.'"

Palunyangkalu wangkangu yirnarangka Mama. Yininga yirna Yaatamu. Wajarnura Yaatamuku, "Nyuntululun kulirnu wantingka nyuntumilingka. Nyamparnangkupula wajarnu, 'Junkuranpula mirrka wartajanu kujujanu, mirtanpula ngalkura.' Nyurilunpula ngalangu. Yuu, nyuntulun walykurnu, mirtajun wangka kangu, paki. Palunyajanu parna walykurriku. Mirrkakuranpula ngurriku parnawana karrpu kujarra karrpungkalu, mirtanpula julyjuyurulu mirrka manku, paki. Wankalpinpula manarrarrimalpa, jamparanpula mirrka ngurriku." Yiltangulyu parna walykurriku. Pakalkuya wartakaja walykukaja parnawana. Pakalkuya mangujikaja, jilkarnkajalurrju. Ngurrikuranpula mirrkaku mangujiwana

jilkarnwana. Yuu, parranpula ngurrilku manku mirrka wupalmarta. Jamparanpula ngurrilku mirrkaku ngalkuraku, palunyangkanpulanya warrkulypa pakalku ngalyawana.

Yuu, Mamalura wajarnu yirnajaraku, "Ngayulurnanta palyarnu parnajanu. Jampan miturriku, marlakun parnarriku. Parnangulyun nyuntu." Palunyangka kirtangurninyjilunga yinijunu wanti, "Yiipi". Wangkajanampa martukajaku nyarrartinkajaku. Wajarnila ngayurtinju, "wanka nyinani". Wajalpayiya nyarrartinju, "yiipi". Yuu, nyamirringulampa yiipinga yarrngaku marlajanuku. Nyamijanampa nyinangu martukajaku marlkarrikajaku julyju. Nyurilampa nyinani nyami ngayurtinku kuwarri. Palunyangkapulanya Mamalu palyarnu yungu pulpupulpu wurna jirriji. Kangkupula junu.

### **Mamalupulanya kaatanjanu yiyarnu**

*Julyjujanu 3:22-24*

Palunyangka Mama ngarnawarrapurlukalu wajarnu, "Ngayuyururingu martu jiinya. Nintirringura kunyjunyuku. Nintirringura walykuku. Kujupa warta mirrkawinti yikini ngaangka yintangka. Jampa yirnalulu ngalku ngaajanu wartajanu, wulu nyinaku wanka, mirta miturriku. Yankura witalyaku martulu jiinya mirrka. Palunyajanurna marrkulku kurtingku ngaajanu yintajanu, yuu." Jilanya wajarnu Mamalu. Palunyangka wajarnu kurtingu yirna Mama ngarnawarrapurlukalu. Kurtingu yinta kujupakarti. Wulu yanu. Mamalu wajarnu kurtingu jiinya martu wartakajajanu yintajanu Yiitanjanu. Yininga yinta Yiitanpa. Parnangkayila jawara ngalkupayi mirrka martulu. Mamalu palyarnu martu parnajanu. Kayilara martulu jawalpayi parnangka mirrkaku, yuu. Mamalupulanya wajarnu kurtinguka ngurlurnu nyupararra yintajanu.

Palunyangkajananya Mamalu kurtingu palumilikaja wikarrukaja. Yanuya yintakarti Yiitankarti wikarrukaja, marrkulkurakujananyaya martukaja. Kakarrarajananya junu Mamalu yintawati wikarrukaja. Mulyawatijananya junu. Kayila Mamalu junu waru tilirrinnya wartakajawati yintawati.

Warunga ngapiyuru?, nayipuyuru warlpukurruyuru. Palypalyarripayi. Warunga kujupakartirripayi. Jampapula marlakurrikijalu yintakarti nyupararra, purtupula kurrungku, paki. Mamalujananya junu wikarrukaja yintangka, warulurrju. Mirtapula yanku marlaku martu kujarra jii kujarra, ngalkurakupula mirrka nyarrangka, paki. Pujupula ngalku mirrka wartajanu kujujanu nyarrangka, wulupula nyinaku wanka, mirtapula miturriku. Palunyajanupula mirta marlaku yanku jii kujarra martu kujarra yintakarti Yiitankarti, paki. Wirrirlikartipula maa yanu.

## **MAMAMILI WANGKA**

Published by  
THE BIBLE SOCIETY IN AUSTRALIA  
Canberra